

AMOS

1 Mejô me Amos, a nga to nsamba beba'ale mintômba ya Tekoa, mme a nga ye ajô Israël melu Ozias njo bôte ya Juda a nga to, a melu Jéroboam mone Joas njô bôte ya Israël a nga to, mimbu mibaé ôsu, éyoñ éte si é ngenan te fô'ôsan.

2 Ane a nga jô na, Jehova a ye bam mfa'a ya Sion, a kuli tyiñ é so'o Jérusalem ; nde miñyanebe ya beba'ale mintômba mi aye yi, a abôbône Carmel d'aye viele.

3 Avale di nde Jehova a jô, na : Amu mintyamane metiñe ya Damas mila, ya, amu minyin, m'aye bo te vaa melepe ya été ; amu be tya'aya Galaad a biôme ya tya'a bidi bi ne bityé. 4 Ve m'aye lôme nduan nda Hazaël été, nje j'aye di'i beta menda me njô bôte ya Ben-Hadad. 5 Nde m'aye bu' éfeta'a ya Damas, a tyi'i bôt be to mbi'ili ya Aven, a tyi'i fe nyô a bili ntum njô bôt mfa'a ya nda bôt Éden ; a bôte ya Syrie b'aye ke minkôm Kir, nalé Jehova a jô.

6 Avale di nde Jehova a jô, na : Amu mintyamane metiñe ya Gaza mila, ya, amu minyin, m'aye bo te vaa melepe ya été ; amu be nga ke ngum ayoñ minkôm, a ke ve wô mo me Édom. 7 Ve m'aye lôme nduan mfa' aka'a ya Gaza, nje j'aye di'i beta menda me njô bôte ya été. 8 Nalé fe m'aye jian bôt be to Asdod, a nyô a bili ntum njô bôt mfa'a ya Askalon; a m'aye kôñelane wo wom Ékron ngame yat; nalé ate mebuka'a ya Bephilistin m'aye jañ, nalé Tate Jehova a jô.

9 Avale di nde Jehova a jô, na : Amu mintyamane metiñe ya Tyr mila, ya, amu minyin, m'aye bo te vaa melepe ya été ; amu be nga ke ngum ayoñ mo me Édom, te ke simesan élate ya bobenyañ. 10 Ve m'aye lôme nduan mfa' aka'a ya Tyr, nje j'aye di'i beta menda me njô bôte ya été.

11 Avale di nde Jehova a jô na : Amu mintyamane metiñe ya Édom mila, ya, amu minyin, m'aye bo te vaa melepe ya été ; amu a nga tôñe monyañ a nkpwaté mekôn, a vaa éngôngol ése, ayaa dé e nga nyap melu mese, ane a nga ba'ale ñyaane wé nnôm éto. 12 Ve m'aye lôme nduan mfa'a ya Théman, nje j'aye di'i beta menda me njô bôt Botsra.

13 Avale di nde Jehova a jô, na : Amu mintyamane metiñe ya bone be Ammon mila, ya, amu minyin, m'aye bo te vaa melepe ya été ; amu be nga tupe mimbubum mi binga ya Galaad mebum, nde b'aye nene nné wop. 14 Ve m'aye kôban nduan mfa' aka'a ya Rabba, nje j'aye di'i beta menda me njô bôte ya été, a miñyôtane ya môse ya mewosan, a ôkôse ya môse ya ôlende ; 15 nde njô bôte wop a ye ke minkôm, ba be bivete bié nsamba wua, nalé Jehova a jô.

2 Avale di nde Jehova a jô, na : amu mintyamane metiñe ya Moab mila, ya, amu minyin, m'aye bo te vaa melepe ya été ; amu a nga di'i bivese bi njô bôte ya Édom bi bo asup. 2 Ve m'aye lôme nduan mfa'a ya Moab, nje j'aye di'i beta menda me njô bôt Kerijoth ; a Moab a ye wu a zô'é, a miñyôtan, a tyiñe toñ ; 3 a m'aye tyi'i mejô ya été, a wôé ba be bivete bise ya été nsamba wua, nalé Jehova a jô.

4 Avale di nde Jehova a jô, na : Amu mintyamane metiñe ya Juda mila, ya, amu minyin, m'aye bo te vaa melepe ya été ; amu be maneya bene metiñe me Jehova, a be nji ba'ale memvinda mé, a minsose

miap mi veyá be nkoban, mmie mite beésa bap be nga wulu été. 5 Ve m'aye lôm nduan mfa'a ya Juda, nje j'aye di'i beta menda me njô bôt Jérusalem.

6 Avale di nde Jehova a jô, na : Amu mintyamane metiñe ya Israël mila, ya, amu minyin, m'aye vo te vaa melepe ya été ; amu be maneya kuane bôt be ne zôsô amu argent, a kuane fe bôt be ne ôsame amu abo bikôndé da — 7 ba b'avebe abu'u ya kômbô mbulu'u ya si ô bete minlô minzôzoé yôp, a vôdne zene ya ba be ne bivôvoé minleme fé : a fam ba ésa b'ake bômbô be ngone minga jijia, a ndaman étyi ya jôé dam e ne étyi : 8 a bebien b'abômbô si mfôm autel ase mengômesane yôp mme be nga nyoñe biban ; a b'anyu vin ya ba be nga ya'an bitom nda ya Zambe wop été.

9 Ve me nga jiane Beamoréen asu dap, mbe be nga to nté ya yôp aval ane nté bilé bi cèdre, a to fe ngul ane bilé bi chène ; ve me nga jiane bibuma bié mfa'a ya yôp, a mindi mié mfa'a ya si. 10 Nalé me nga soo mia si ya Égypte, a wulu mia fé été mimbu mewôm menyin, nde te mi aye nyoñe si ya Beamoréen. 11 A me nga bete bone benan be bo bekulu mejô, a bendômane benan be bo Benaziréen. Ke e ne fo'o nalé, A mia bone be Israël? Nalé Jehova a jô. 12 Ve mi nga viane ve Benaziréen vin na be nyu, a tiñeti bekulu mejô na, Te kulane mejô.

13 Mi lô, m'aye fite mia vôme wônan, aval ane wagon a fit, a to mimbom bidi été ne lut ! 14 Nde mbile w'aye jañe be nyô a ne avôlô dulu; a nyô a ne ngu a ye bo te kô'ôlane ngule jé; nalé fe nyô a ne éwôlô a ye bo te nyii émien ; 15 nalé fe nyô a bili élaé mo a ye bo te tebe; a nyô a ne avôle mebo a ye bo te nyii émien ; nalé fe nyô a wulu ékabela yôp a ye bo te nyii émien; 16 a nyô a ne ayo'o nlem biwôlô bi bôt été a ye mate soé môs ôte, nalé Jehova a jô.

3 Wô'an ajô Jehova a bo'olôya mia di, A bone be Israël, di a bo'olôya ngume nda bôt me nga soo wô si ya Égypte, a jô na, 2 Mia étam menda me bôte ya si nyô me nga yem: jam ete nde m'aye zu mbia be mam menan mese be mia. 3 Ye bôte bebaé b'aye wulu nsamba nge be nji bo nleme wua? 4 Ye ñbweñbwem j'aye bam afan été, nge é nji bi jôm? ye étoñ ñbweñbwem j'aye yôn, tyiñ é so'o vôm a bô'ô, nge a nji wôé jôm? 5 Ye ônon ô ne ngule ya bili tya'ale si, vôm be nji lame vie ôlam ? ye ôlam vi aye bii si, te ke jôm é tii été ? 6 Ye b'aye loñe toñ nlam, bôt te ko woñ ? ye abé d'aye kui nlam, Jehova te bo jam ete ? 7 E ne fo'o na, Tate Jehova a ye bo te bo jam, ve a ye liti bebo bisaé bé bekulu mejô nsolane jame wé. 8 Ñbweñbwem é bameya ; za a ye bo te ko woñ ? Tate Jehova a kobôya; za a ne bo jam afe ve kulu mejô ?

9 Kañeta'ane beta menda me njô bôt été mfa'a ya Asdod, a beta menda me njô bôt été mfa'a si ya Égypte, a jô na, Sula'ane miabebien minkôle ya Samarie yôp, a yen aka'a beta bindundumba e ne été, a avale bikpwe'ele e ne ézezañe ya été. 10 Amu ba b'akôan évô a ñwôlane biôm beta menda me njô bôte map été, be nji yeme bo zôsô, nalé Jehova a jô. 11 Ajô te avale di nde Tate Jehova a jô, na : Nsiñ a ye bo, ja'ana si ébien mbôma'ane ; nnye ate a ye vaa wo ngule jôé, a beta menda me njô bôte môé m'aye saban. 12 Avale di nde Jehova a jô, na : Aval ane mba'ale mintômba a nyii binam bibaé nge éfus alo anyu ñbweñbwem, aval ete bone be Israël b'aye nyiñ, ba be to si Samarie abu' énoñ, nge tabe bibônga bi énoñe yôp bi ne mboan a bibubute bindelé.

13 Vô'ôla'an, a bo'olô nda bote Jacob, nalé Tate Jehova, Zambe ya minsamba mewosan, a jô. 14 Amu môs m'aye zu mintyamane metiñe ya Israël be nye, m'aye fe lepe beautel ya Béthel ; a minla'a mi autel mi aye tyi'iban, a ku si. 15 A m'aye tyam nda ôyôn a nda ésep ; a menda mimbañ m'aye jañ, a beta menda m'aye man, nalé Jehova a jô

4 Vô'ôla'an ajô di , mia beyale binyaka ya Basan, mi to mfa'a nkôle Samarie ; mia mi akpwe'ele minzôzoé, a fite bôt be ne ôsame, mia mi ajô beésa bape na, Za'ane biôm, bi tame nyu. 2 Tate Jehova a maneya kan ngana a étyi jé na, tama yenan, melu m'aye zu be mia, mme b'aye dutu mia a akop, a mebuka'a menan a minnop. 3 Nde mi aye ke atan mevôme ya aka'a me ne ntyaman, mô't ase zôsô asu dé ; a mi aye wua miabebien Harmon été, nalé Jehova a jô.

4 Za'ane Béthel, a tyam metiñ ; za'ane Guilgal, a fôlô mintyamane metiñ ; za'ane biôm bienan mi aye tyik tyé ése, a mengape ya awômô menan melu mela mese azu da ; 5 mi ve mveane ya akéva ô so'o biôm bi ne mvusan, a kate foé ya mimvean ane minlem mi anye'e, akañete jam ete bôt été : amu nalé mi anye'e, A mia bone be Israël, nalé Tate Jehova a jô.

6 Ma fe me maneya ve mia mfuban ya mesôñ minlam mienan mise, a njembane fembé bito bienan bise ; ve a kôsa bo nalé, mi nji bulane be ma, nalé Jehova a jô. 7 Ma fe me kameya mia mveñ, éyoñ éte nkôane bidi ô ngenan ngon éla ôsu ; me nga bo me no'o nlame wua mveñ, a bo me bo'o te noo mveñ nlam mfe : éfuse si jia é nga noñ mveñ, a éfus é nji noñe mveñ é nga viele. 8 Nalé minlam mibaé nge mila mi nga ke mi andeñ nlame wua a nyu mendim, te ke yen abim d'ayian : ve akôsa bo nalé mi nji bulane be ma, nalé Jehova a jô. 9 Me ndamaneya mia a vian a mbun : biku'um bi maneya di jama mefupe wônan a mefupe mindi'i menan a befiguier benan a beolivier benan : ve a kôsa bo nalé, mi nji bulane be ma, nalé Jehova a jô. 10 Me lômeya mia ébubua ôkon avale fe ane Égypte : me wôéya bendômane benan a nkpwaté mekôn, a mane fe ke bikabela bienan ; a me boya na, mbia ényume ya nkane wônan a zu kui mimbile mi môé mienan été : ve a kôsa bo nalé, mi nji bulane be ma, nalé Jehova a jô. 11 Me tyameya minlam be mia, aval ane éyoñ Zambe a nga tyam Sodome a Gomorrhe, a mi nga to aval ane ési'i be nga to'é ndi'an été: ve a kôsa bo nalé, mi nji bulane be ma, nalé Jehova a jô.

12 Ajô te m'aye bo wo ana, A Israël; nalé fe amu m'aye bo wo jame di, kômesa'ane na, ô tôbane Zambe wôé, A Israël. 13 Amu na, nyô a kôm minkô, a té évuñulu, a kate mô't jam a simesan ; nyô a bo tyé dibi, a wulu mevôme ya si nyô me ne mbetane yôp — Jehova, Zambe ya minsamba mewosan, jôé dé le.

5 Vô'ôla'an ajô m'ato'é di ane m'ayône mia, A nda bôte ya Israël. 2 Endun ngon ya Israël é kuya ; j'aye fe beta kôlô si : be nga dume je si si jé ; mô'te ya bete je si a ne momo. 3 Amu avale di nde Tate Jehova a jô, na : Nlam ô nga ke toyini a bôt w'aye li'i ntet, a wu ô nga ke ntete bôt w'aye li'i awôm, mfa'a nda bôt Israël.

4 Amu avale di nde Jehova a jô nda bôt Israël na, Jeñane ma, wôna mi aye nyiñ ; 5 ve te jeñane Béthel, nge nyine Guilgal, a te lôtan mfa'a ya Beer-Schéba : amu Guilgal a ye fo'o ke nkôm, a Béthel a ye bo momo. 6 Jeñane Jehova, wôna mi aye nyiñ ; a za bo na, a ye ngetan aval ane nduan nda bôte Joseph été, a j'aye di'i, a nyô a ye dime je a ye bo momo Béthel. 7 Mia mi akôñelane nya ntyi'ane mejô a bo ayôl ane ôvuta, a wua zôsô si, 8 jeñane nyô a té atété ya Ekoé-bengon a Nkel-ôvôn, a kôñelan nsisiñe ya awu ô bo tyé, a bo mô's dibi a alu ; nyô a loene mendime ya mañ, a sôé me asu ya si nyô (Jehova a ne jôé dé) : 9 nyô a zu njiane ya temetem be ba be ne ngu, nalé njañan w'kui ôlem.

10 B'asiñe nyô a lep mfa'a ya mbé akak, a b'avini nyô a kobô zôsô. 11 Ajô te, vôm mi atibi nzôzoé yôp, a nyoñe nye nlisi ésôña'a : mi maneya lôñe menda a mimbaane mekok, ve mi aye bo te tabe me été ; mi maneya bé mbamba mefupe mindik, ve mi aye bo te nyu vin ya été. 12 Amu m'ayem abim abui ya mintyamane metiñe mienan, a abim anene ya mam abé menan — mia mi wô 'ô ndeñele

nyô a ne zôsô, a nyoñe tañe ya b'akuse mia, a yala bôt be ne ôsame feñ ba b'azu mbé akak, be bo te nyoñ mam b'ayiane nyoñ. 13 Ajô te nyô a ne ntye a ye tabe évô aval éyoñ éte ; amu é ne mbia éyoñ.

14 Jeñane mvaé, sa abé, nde te mi aye nyiñ ; a nalé ate Jehova, Zambe ya minsamba mewosan, a ye tabe be mia, ane mi ajô. 15 Vina'ane abé, a nye'e mvaé, a mi telé'é nya ntyi'ane mejôô mbé akak : nalé éyoñ éziñ Jehova, Zambe ya minsamba mewosan, a ye mvamane mebuka'a me Joseph.

16 Ajô te avale di nde Jehova, Zambe ya minsamba mewosan, Tate, a jô, na : Miñyôn mi aye bo mezene mese me ne ndam ; a b'aye jô minseñe mise na, Ngo'é ! ngo'é ! nde b'aye loene mba'ale mefup a zu ébeñese, a ba be ne atyeñe ya yôn be zu yôn. 17 Miñyôn mi aye bo mefupe mindi'i mise ; amu m'aye lôte zañe jôé, nalé Jehova a jô.

18 Ngo'o mia mi akômbô môse ya Jehova ! Amu jé mi aye bi môse ya Jehova ? O ne dibi, sa éfufup. 19 Aval ane môt a mate ñbweñbwem, ours ve viane tôbane nye ; nge nyin nda a ye'é wô mfin, nyo ve lôpe nye. 20 Ke môse ya Jehova w'aye bo dibi, te bo éfufup ? étua dibi, a te ke mfaéan été ?

21 M'avini, m'abiasé bisulane bidi bienan, a m'aye bo te yene benya bisulane benan mvaé. 22 Ya, a kôsa bo mi ave me mimveane mienan b'adi'i nduan a mimveane avut, m'aye bo te nyoñe mie ; nalé fe m'aye te semé mimveane ya bo mvo'é ya betite benan be ne avoñ. 23 Va'a ma zô'é ya bia biôé ; amu m'aye wô'ô tyiñe ya memvete môé. 24 Ve nya ntyi'ane mejôô a lôtôk aval ane mendim, a zôsô aval ane éwolo ôsôé.

25 Ye mi nga zu me biôme ya tyik a mimveane fé été mimbu mewôm menyin, A nda bôt Israël ? 26 Ya , mi nga be'e tabernacle ya njô bôte wônan a ésame ya bengunemelane benan, ôteté ya zambe wônan, nnye ate mia bebien mi nga bo. 27 Ajô te m'aye ke mia minkôm Damas yat, nalé Jehova a jô, jôé dé e ne na, Zambe ya minsamba mewosan.

6 Ngo'o ba be to mvo'é Sion, a ba be to mvo'é nkôle Samarie, te mate jôm, beta be bôte ya ayoñ e ne ma mevo' ôsu, mbe beta nda bôt Israël j'azu be be! 2 Lôtan mfa'a ya Calné, a yen; akôlô ya vôm ate, kelane Hamath a ne anen; wôna mi lumbu'u a ke Gath ya Bephilistin: ye be ne mvaé a dañe meyoñe ma ? nge na, ye nné wop ô ne anen a dañ nné wônan ? 3 — mia mi atindi mbia môs ôyap, a dutu éto ya évô é zu bebé; 4 ba b'abômbô si binoñe mimbañ, a sam menyôle map binoñe biape yôp, a di bone mintômba ya mbam, a bone binyaka bi aso abemba; 5 ba b'ayia zesé bia a tyiñ mvet; ba b'até biôme ya bôm mfa'a wop, aval ane David; 6 ba b'anyu vin bido'o bisua été, a wo'o bebiene mimbon mi adañ mvaé; ve be nji wô'ô nju'u ya Joseph ôlun.

7 Ajô te éyoñe ji b'aye ke minkôm nsamba ya ba b'ataté ke minkôm; a ésasô'ô ya ndiane ya ba be nga sam menyôle map j'aye lôt. 8 Tate Jehova a maneya tiñeti a émien, nalé Jehova, Zambe ya minsamba mewosan, a jô, na: M'awô' étôto'o ya Jacob angôndô, a vini menda me njô bôte mé; ajô te m'aye kee nlam mo me bôte befe, a biôm bise bi ne été. 9 A ye bo na, nge bôt awôm b'aye li'i nda jia, b'aye wu. 10 A éyoñ ésa mongô ya môt a ye nyoñe nye, nyô a di'i nye nduan, mfa'a ya vaa bives nda, a jô nyô a ne étune ya zañ nda na, Ye môt a ngenan be wo? nye ke a ye jô na, Momo; éyoñ éte a ye jô na, Tabe' évo; amu bi vo'o tote Jôé Jehova. 11 Amu, ô lô, Jehova a tiñeti, nde nda é ne anen j'aye bu'uban mimfin, a nda é ne tyôtyoé j'aye salane mimban.

12 Ye bikabela bi ne mate ako'o yôp ? ye mot a ne senane si vôm ate a beyôm binyaka ? ane mi maneya veñesane nya ntyi'ane mejôô a bo zôñ, a veñesane fe ébuma ya zôsô é bo ôvuta ; 13 mia mi avak a jôm é ne momo, a jô na, Ke bi nyoñeya minla'a mfa'a wongan amu ngule jangan ? 14 Amu, ô lô,

A nda bôt Israël, m'aye telé mia ayoñ ngame yat, nalé Jehova, Zambe ya minsamba mewosan, a jô ; mbe b'aye kpwe'ele mia aso anyine Hamath akui ôtôñe ya Araba.

7 Avale di nde Tate Jehova a nga liti ma : tame yen, a nga kôm bintandak atata'a ya mfaane biwô'é ; ôlô, bi mbe biwô'é ya éyoñ nlian njô bôt ô maneya. 2 Nde a nga bo na, éyoñ be nga mane di ôbute ya si éte, éyoñ éte me nga jô na, A Tate Jehova, m'aye'elane wo na, ô jamé'é : Jacob a ye tebe aya ? amu a ne tyôtyoé. 3 Ane Jehova a nga jôbane jam ete : D'aye ke bo, nalé Jehova a jô.

4 Avale di nde Tate Jehova nga liti ma : tame yen, Tate Jehova a nga loene na, a ye wosan a nduan ; nje éte é nga di'i beta édok, é nga ye fe di'i si. 5 Eyoñ éte me nga jô na, A Tate Jehova, m'aye'lane wo na, suku'u : Jacob a ye tebe aya ? amu a ne tyôtyoé. 6 Ane Jehova a nga jôbane jam ete ; Dina fe d'aye ke bo, nalé Tate Jehova a jô.

7 Avale di nde a nga liti ma : ô lô, Tate a tele mfôm akak e mbe nlôñan a nkol ô tii atyi étyé d'asôane biôme zôsô, a bili fe nkol ô tii atyi étyé wo wé. 8 Ane Jehova a nga jô me na, A Amos, w'ayene jé ? Me na, Nkol ô tii atyi étyé. Eyoñ éte Tate a nga jô na, Tame yen, m'aye telé nkol ô tii atyi étyé zañe ya bôte bam Israël ; m'aye bo te beta lôte be éyoñ éfe ; 9 a bito ya bikôndô'ô yôpe ya Isaac bi aye bo bilik, a mevôme ya Israël me ne étyi m'aye tyamban ; a m'aye kôlô si a nkpwaté mekôn a tebe nda bôte Jéroboam ngame yat.

10 Eyoñ éte Amatsia prêtre ya Béthel a nga lôme Jéroboam njô bôte ya Israël tyiñ, a jô na, Amos a maneya bôndé mbia jame ya sengane wo nda bôt Israël éte : si é se ngule ya jibi mejô mé mese. 11 Amu avale di nde Amos a jô, na, Jéroboam a ye wu a nkpwaté mekôn, a b'aye fo'o ke Israël nkôm a kôlô si jé. 12 Nalé fe Amatsia a nga jô Amos na, A wo ñyene mam, kelek, ô mate a ke si ya Juda, a di fembé wôé, a kulu fe mejô wôé: 13 ve te fe beta kulu mejô Béthel ; amu a ne éto étyi ya njô bôt, a ne fe nda njô bôt.

14 Eyoñ éte Amos a nga yalan, a jô Amatsia na, Me mbe ke nkulu mejô; nalé fe te ke bo mone ya nkule mejô ; ve me mbe mba'ale biyem, a nkôm bilé bi sycomore: 15 nde Jehova a nga nyoñe me mfa'a me nga tôñ mbam, a Jehova a nga jô me na, Kele' kulu mejô be bôte bam Israël. 16 Ajô te éyoñe ji, wo, wô'ô njôane Jehova : W'ajô na, Te kulu mejô mfa'a ya Israël, a te suu éfia jôé mfa'a nda bôt Isaac ; 17 ajô te avale di nde Jehova a jô, na : Nyo nga a ye bo minga bijabô nlam, bo be fam bôé a bo be binga bôé b'aye wu a nkpwaté mekôn, a si jôé j'aye kaban a nko ; a womien w'aye wu si é ne mvin, a b'aye fo'o ke Israël nkôm a kôlô si jé.

8 Avale di nde Tate Jehova a nga liti ma : tame yen, jate bibuma ya ésep. 2 Ane a nga jô na, A Amos, w'ayene jé ? Me na, Jate bibuma ya ésep. Eyoñ éte Jehova a nga jô ma na, Asu'ulan e soya be bôt bam Israël; m'aye bo te beta lôte be éyoñ éfe. 3 Môs ôte bia ya temple bi a ye bo miñyôn, nalé Tate Jehova a jô: mimbim mi aye bo abui; vôm ase b'aye wua mie fé be to ne kubuk!

4 Vô'ôla'ane ajô di, A mia mi akômbô mine bôt be ne ôsame, a ja minzôzoé ya si nyô ne ntuk, 5 a jô na, Meté me ngon m'aye lôte éyoñ évé, ane bi aye kuane fôn ? a sabbat, ane bi aye kuli nlisi, a bo nkoé tyôtyoé, a sicle anen, a kuan ékotekot a kope ya medu'an; 6 nalé bi aye kuse minzôzoé a argent, a kuse fe bôt be ne ôsame a abo bikôndé, a kuane mekuta'a me nlisi? 7 Jehova a kaneya ngana a étôto'o ya Jacob na, M'aye fo'o bo teke vuane jame da ya mimboane miap nnôm éto. 8 Ke si j'aye

nyeñeban amu ajô di, a môť ase a to été a ye yôn ? ya, j'aye bet ése aval ane Osôé; j'aye fe fô'ôsan a beta sis, aval ane Osôé ya Égypte. 9 Tate Jehova a jô na, Môs ôte a ye bo na, m'aye tindi jôp e dime zañe môs, a m'aye ve si dibi éyoñ môs ô ne éngengeñ. 10 M'aye kôñelane bisulane bidi bienan du, a bia bienan bise miñyôn ; m'aye jalé mengeteñe mese minkuta, a ve nlô ôse ntui ; m'aye bo jam ete aval ane ébeñese ya atyi'i mona fam, a asu'ulane ya été aval ane mbia môs.

11 Tame yen, melu m'azu, nalé Tate Jehova a jô, mme m'aye lôm mfumbale ya zaé si nyô, sa zaé ya fembé, nge évé ya mendim, ve nyô ya ñwô'ane mejô me Jehova. 12 Nalé b'aye ke b'andefñ, aso mañ akui mañe mevok, aso fe nord akui mfa'a jôp d'atôô; b'aye ke b'amate li a li a jeñ ajô Jehova, ve te ke yene de. 13 Môs ôte abeñe bindune bengon ba be bendôman b'aye ku som amu évé. 14 Ba b'akalan abé ya Samarie, a jô na, A Dan, ane zambe wôé a vee; a na, Ane zene ya Beer-Schéba é vee; b'aye ku, te fe beta kôlô si.

9 Me nga yene Tate a tele mfôm autel: ane a nga jô na, Bibi'i mendok, nde te mimbô'ô mimbé ya si mi aye fô'ôsan ; ô bu'u me bifus minlô ya be bese yôp; a ma m'aye wôé susu'a môte ya be be a nkpwaté mekôn: te ke môte wua ya be be a ye tup, a te ke môte wua ya be be a ye nyiñ. 2 Ja'an b'afa'a si a kui Sheol, wo wom w'aye vaa be vôm ate; ja'an b'abet akui yôp été, m'aye sili be si vôm ate. 3 Ja'an b'asobô abôbône Carmel, m'aye jeñe be a vaa be vôm ate, ja'an be solô mise mam édo'o ya mañe si, vôm ate m'aye ve nyo atiñ, nje j'aye lôpe be. 4 Ja'an b'ake minkôm besiñe bap ôsu, vôm ate m'aye ve nkpwaté mekôn atiñ, ñwô w'aye wôé be: a m'aye ndôné be mise mam ndônane ya abé, sa wu ya mvaé.

5 Amu Tate, Jehova ya minsamba mewosan, nnye a ne nyô a nambe si, je ve nyeme, a ba bese be to été b'aye yi; j'aye bet ése aval ane Osôé, a beta sis, aval ane Osôé ya Égypte; 6 nnye ate a ne nyô a lôñe bitune menda bié yôp été, a teléya fe ñyeme wé si nyô; nyô a loene mendim ya mañ, a sôé me asu ya si nyô; Jehova a ne jôé dé.

7 Ye mi nji bo aval ane bone ya Beéthiopien mfa'a wom, A bone be Israël ? nalé Jehova a jô. Ye me nji soo Israël si ya Égypte, a Bephilistin mfa'a ya Caphtor, a Besyrien mfa'a ya Kir? 8 Tame yen, mise me Tate Jehova m'afombô mbia ayôñ, a m'aye jiane de ne meñ si nyô ; ve na, m'aye bo te jiane nda bôte Jacob ne meñ ! nalé Jehova a jô. 9 Amu, ô lô, m'aye ve atiñ, a m'aye se'ese nda bôt Israël meyoñe mese été, aval ane b'ase'ese nlisi ése'ese, to dis d'adañe tyôtyoé d'aye ku si. 10 Bebo mam abé bese ya be bôte bam b'aye wu a nkpwaté mekôn, ba b'ajô na, Abé d'aye koane bia nge tôbane bia.

11 Môs ôte m'aye bete tabernacle ya David a ne nkuane si yôp, a dipe mevôme ya été me ne mintyaman ; a m'aye bete mintu'u ya été si, a m'aye lôñe nye aval ane melu kôa ; 12 nde te b'aye bi mebuka'a me Édom, a meyoñe mese m'aloban a jôé dam, nalé Jehova nyô a bo jam ete a jô. 13 Tame yen, melu m'azu, nalé Jehova a jô, mme môť a senane si a ye koane nyô a kôane bidi, a môť a miate bibuma mindik a mebo a ye koane nyô a miase fes ; minkôle mi aye tolô vin a ne éyôyok, a bone minkôle bese b'aye nyeme. 14 Nde m'aye beta soo bôte bam Israël minkôm, a b'aye lôñe minlam mi nga saban, a tabe été; a b'aye bé mefupe mindik, a nyu vin ya été ; b'aye fe bo mefup, a di bibuma ya été. 15 A m'aye bé be si jap, a b'aye bo te beta tébane si jap me nga ve be, nalé Jehova Zambe wôé a jô.